

四庫全書

史部

欽定四庫全書

史部

山西通志卷四十七

詳校官監察御史_臣查善長

檢討_臣德生覆勘

總校官進士_臣朱 鈐

校對官助教_臣蔡 鎮

謄錄監生_臣胡曉春

欽定四庫全書

山西通志卷四十七

物產

志地理者旁及物產紀乘又有異物錄山西土瘠水陸之產視他地為薄錄之以備土風也至壤特之物暨產雖絕而昔常產者亦間附記焉志物產

山西省

稷 周禮職方氏曰冀州其穀宜黍稷稷似黍而小

月令章句稷秋種夏熟歷四時備陰陽穀之貴者

一名稭呂氏春秋飯之美者有陽山之稭 高誘曰

關西謂之縻冀北謂之黍即詩維縻維芑轉音也說

文縻稭也廣雅縻稭也然則稷也稭也縻也縻也名

殊而實一也苗似蘆有毛高三四尺結穗殊疎散粒

有殼視粟而巨光滑過之先諸穀熟刈欲早過熟即

隨風落米色特黃故土人稱黃米 一名粢祭祀之

號稷曰明粢 爾雅翼稷者五穀之長故陶唐之世

名農官為后稷其祀五穀之神與社相配亦以稷為名以為五穀不可徧祭祭其長以該之

黍 苗穗胥似稷而大實圓重土高燥者宜黍黍以大暑種故謂之黍刈後乘濕打則粃易脫 李時珍曰黍稷一類而二種黏者為黍不黏者為稷猶稻之有粳糯也今通稱黍子不復知為稷矣有黃白赤黑四種胥可釀酒黑者為秬黍詩維秬維秠

穀 即五穀中之粱也脫殼則為粟米亦曰小米今直

名曰穀孟詵謂人不識粟李時珍謂人不識梁穗大毛長而粒粗者為梁穗小毛短而粒細者為粟其實一物也 春秋題辭西乃金之位米乃陽之精故西合米為粟 許慎曰粟之為言續也續於穀也古者以粟為黍稷梁秫之總稱而今之粟古但稱為梁後乃專以梁之細者名粟今北人呼為穀子有早穀晚穀二種汾州北諸屬胥三四月種早穀有一窩蜂關東黃夏穀諸種晚穀有四根齊六根齊九根齊秤杵

黃老來白臨秋變三變連草穀溜雨穀諸種汾州南
諸屬胥五六月種早穀有馬拖韁白老漢竹葉青金
棒杵銀棒杵黃瓜黃六稜象尾穀黃穀諸種晚穀有
潞州黃一把箭纏子條料角白紅老漢狼尾稍猪咬
齊鐵耙齒菠菜根天青穀籬毛穀青穀梁穀諸種早
穀中黃穀白老漢象尾穀三種耐旱馬拖韁白老漢
二種耐風象尾穀又耐雨晚穀中潞州黃青穀猪咬
齊三種耐旱纏子條紅老漢狼尾稍菠菜根籬尾穀

五種耐風紅老漢狼尾稍獾毛穀三種又耐雨旱
穀以六十日為率宜旱田晚穀以一百二十日為
率宜水田惟潞州黃一種早種則晚熟晚種則早
熟水旱田胥宜又穀之黏者曰秣有黃秣黑秣
龍爪秣諸種胥可釀酒昔陶淵明官田種秣即是
物也

稻 詩豳風十月穫稻爾雅翼一名秣稻宜於水田種
藝之法詳

聖祖仁皇帝御製耕織圖中有稷糯秈三種稷不黏可為飯糯黏可為糕用以釀酒尤佳太原桑落汾州羊羔胥以糯為母者也秈比於稷小而尤不黏其種甚早土人號秈為早稻稷為晚稻與江淞田家詳晰稷糯秈者差異春秋說題辭稻之為言藉也稻冬含水盛其德也故稻太陰精含水漸茹乃能化也江旁多稻乃其宜也

高粱 一名稻秫種來自蜀一名蜀秫土人又稱茭子

在太原屬者苗低穗緊在汾州屬者苗高穗鬆在平陽絳州諸屬者有早秣晚秣二種早秣有大老漢小老漢諸種晚秣有紅黑黃白蓬頭諸種蓬頭穗下垂紅黑白三種穗上生黃穗四面分披粒無殼者米硬可為粥有殼者米軟可為酒醋潞安諸屬復編稽為箔以造屋陶淵明曰秣黍已秀翠色染人如剖胸襟一洗荆棘

麥 五穀之最貴者有大麥小麥二種大麥作粥飯殊

滑蕪可為餠有露仁不露仁諸種小麥皮薄多白麪
食之宜人有火麥黑芒火麥紅麥白麥和尚麥諸種
汾州北諸屬春分前種處暑後收名春麥汾州南諸
屬白露前種芒種後收名宿麥漢武帝紀勸各郡種
宿麥種收隔歲故號宿麥汾州南諸屬亦有春種大
麥名春大麥又麥之別種曰燕麥俗稱莖麥夏秋種
性寒宜邊地太原大同朔平寧武及吉陽澤汾近屬
胥有之曰蕎麥秋種有紅黑斑三種諺曰中秋有月

則蕎麥多實諸屬胥有之

豆 即菽也種有八一豌豆有白綠二種白者味甘作羹佳一黑豆又名雄豆入藥良有夏黑豆麥樓子一窩蜂三種夏黑豆麥樓子就地蔓生花白顆小一窩蜂高幹叢生花紅顆大一萊豆有摘角刈梗二種摘者角無毛顆小刈者角有毛顆大一大豆有醬色雞眼睛黃豆白豆大黑豆大萊豆六種白豆早熟黃豆可榨油造醬兼可作腐一小豆有赤白二種赤者可

辟瘟一豇豆有菜豇豆柴豇豆二種菜豇豆蔓長者
懸架結角蔓短者鋪地結角胥可為蔬有青黃黑白
赤斑六色青者類黑眉目象人面一名人頭豆柴豇
豆類可佐粥一茶豆有猪芽豆火茶豆篦片豆刀豆
四種一扁豆花如小蛾翅尾俱全一名蛾眉豆豌豆
春冬種冬種者角多扁豆春種餘胥夏秋間種諺曰
穀三千麥六十豌豆八扁二豇十一蓋豐稔之驗也

麻有四種一種大麻色蒼而圓可榨油 李時珍曰

大麻卽火麻亦曰黃麻處處種之剝麻收子有雌有雄雄者為梟雌者為苴其皮可作布作屨亦可為繩索其稽白而有稜輕虛可為燭心遼沁等地饒焉一種色黑惟榨油甚宜名胡麻生則性寒炒則性熱竒嵐等地饒焉沈存中筆談胡麻卽今油麻古者中國止有大麻漢使張騫始自大宛得油麻故名胡麻本草名狗蟲多脂油言其形似狗蟲也又曰八穀之中惟此最良一種色白亦宜榨油平陽殊多猗

氏特盛李時珍曰白油麻秋開白花亦有紫帶艷者節
節結角長可寸許有四稜六稜者房小而子少七稜八
稜者房大而子多或名胡麻俗作芝麻非一種名巨勝
別錄胡麻又名巨勝生上黨川澤本草巨勝有七稜色
赤味酸澁者乃真其八稜者兩頭尖者及烏油麻並呼
胡麻誤矣土人云下子時夫婦同種即茂盛故本事詩
云胡麻好種無人種正是歸時又不歸

玉蜀黍 其苗葉胥似高粱穗如秕麥葉旁別出一苞

垂吐白鬚久則苞坼子出顆顆攢簇俗名玉林

鐵 山西府州產鐵之地十之八九其不產地十之一二

而鼓鑄胥資焉 按本草所在坑冶有之川蜀湘東滋

多而太原澤州陽城高平廣靈為尤勝 後漢志安邑

有鐵平陽侯國有鐵皮氏有鐵大陵有鐵 漢元封元

年桑弘羊建議榷鹽鐵 鐵官凡四十郡太原大陵河

東安邑絳人安民平陽 漢法民私鑄鐵者鈇左趾博

士至郡國矯詔令民鑄農器者罪至死 唐鐵冶

合金
銀錫

冶凡一百八十六鐵山五 德宗時戶部侍郎判度支

韓洄言天下銅鐵冶乃山澤利當歸王者請悉隸鹽鐵使從之 元和時採鐵二百七萬斤 裴休為鹽鐵使

增鐵山七十一歲率鐵五十三萬二千斤 後唐長興

二年勅令今後不許農器燒器動使諸物並許百姓逐

便鑄造諸道監冶除依常年定數鑄辦供軍熟鐵並器

物外祇管出生鐵比已前價各隨逐處見定高低每斤

例減十文貨買雜使熟鐵亦任百姓巡檢節級勾當賣

鐵場官並鋪戶一切並廢鄉村百姓於夏秋苗畝上納農器錢一文五分足隨夏秋二稅交納 晉天福六年詔諸道鐵冶三司先條疏百姓農器破者須於官場中買鑄時却於官場中買鐵今後許百姓自行鑄造買賣所在場院不得禁止攪撓 宋產鐵四監一曰大通十二冶又

二十四務

榆次縣北寺古村
宋置冶址猶存

至道末歲課五百七十四

萬八千餘斤 真宗初河東轉運使宋搏言大通鹽鐵

冶盈積可備諸州軍數十年鼓鑄願權罷採以紓民

景德元年弛邊民鐵禁河東轉運使陳克佐奏減澤州大
廣治鐵課 天禧末歲課六百二十九萬三千三十餘斤
皇祐中七百二十四萬一千一斤 治平中增百餘萬
熙寧中河東轉運使劉庠計一路之產鐵利為饒請
復舊治鼓鑄 元豐元年五百五十萬一千九十七斤
政和間臣僚言諸路產鐵請仿茶鹽法權鬻從之

靖康元年蠲損坑冶 故關鐵冶元設提舉司在襄陵
京安鎮 元太宗丙申年立爐於西京州縣撥冶戶七

百六十煽焉丁酉年立爐於交城縣撥冶戶一千煽焉

元貞二年置河南山西等處鐵冶提舉司提舉一員

正四品同提舉一員正五品副提舉一員從六品掌各

冶採金煉鐵權貨以資國用大德十一年聽民煽煉

官為抽分至大元年復立河東都提舉司掌之所隸

冶八曰大通曰興國曰利國曰惠民曰益國曰潤富曰

豐寧之冶蓋有二焉

交城西北西冶村有都提舉司鐵冶廢址即大通監

齊神武

館客秦母懷文造鐵刀其法燒生鐵精以重柔鋌數宿則

成鋼以柔鐵為刀脊浴以五牲之溺淬以五牲之脂斬甲過三十札後襄國治家所鑄宿柔鋌是其遺法作刀猶甚快利但不能頓截三十札也夢溪筆談世間所謂鋼鐵者用柔鐵屈盤之乃以生鐵陷其間泥封煉之煅令相入謂之煉鋼亦謂之灌鋼此乃偽鋼耳暫煅生鐵以為堅二三煉則生鐵自熟仍是柔鐵予出使至磁石鍛坊觀鍊鐵方識真鋼凡鐵之有鋼者如麪有筋灌盡柔麪則麪筋乃見煉鋼亦然但取精鐵鍛之百餘火每鍛稱之一鍛一輕至累

鍛而斤兩不減則純鋼也雖百煉不耗矣此乃鐵之精純者其色明瑩磨之黯然青而且黑與常鐵迥異亦有煉之至盡而全無鋼者皆係地之所生也磁州鍛坊乃山西鐵也晉鐵之多鋼可見 遼州高巍開鐵冶疏以臣鄰境所有言之今在河南之北北平之南山西之東山東之西舊有八冶曰臨水曰彭城曰固鎮曰雀爐曰祁陽曰山嘴兒曰砂窩曰渡口元時設立總司提督煽取日萬貫今諸有丁力之家或三戶或五戶起爐一座每月課收鈔貫止

徵鐵數 元錫里哈雅大通治辨延祐己未直北歲饑知其民怠於稼穡命有司給官鐵鼓鑄犁鏵二萬副以勸斯民耕作之用 明駙馬都尉焦某取鎖鐵坑鐵製刀甚利王崇古鐵鍋互市疏臣聞廣鍋輕而不受鈔煉而忠順王懇求得如薊遼例以廣鍋充市既而科臣言責諸道以廣鍋炒煉如可成鐵即禁勿與據各道稱生廣鐵十斤煉鐵五斤尚未堪打造繼因宣大廣鍋價貴而販少諸匠謂潞鍋生麓炒煉倍折乃以潞鍋一口責匠炒煉每生鍋十

斤僅得鐵三斤若舊鍋用久破裂僅得二斤價賤三倍
臣今計廣鍋潞鍋價賤而煉少者許諸部以破舊赴官
市易新鍋漢制郡有鐵官不出鐵者置小鐵官大鐵
官鑄生鐵小鐵官打熟鐵鐵有生熟一從大鐵官易之
是故元以前有鐵冶司明罷鐵官始廢署畢振姬讀
鹽鐵議生鐵伐鑛熾炭為之鐵成而加薪乃熟熟可剪
刀耒耜鋤鑿鎌鉞釘鐫打作之屬利熟生可礮砲鐘鼎
鍋鐸鑄作之屬利生生熟間為錠為鋼鋼又南北之鐵

混鎔也可鋸可錯可鑿且鑄且打之屬利生熟

礬 有白礬黃礬綠礬黑礬絳礬柳絮礬自流礬本草云
白礬出晉州慈州綠礬出隰州一統志云太原交城平定
臨汾大同俱出李時珍曰礬者燔也燔石而成者也 唐

常貢太原郡歲貢礬石三十斤於晉州置平陽院以收其
利開成三年度支奏罷之以礬山歸州縣五州創務置官

吏 宋制白礬出晉慈州汾州靈石縣

靈石場至道初廢景德元年復

置大中祥符八年又廢其礬徒就晉州慈州場曰芥泉

綠礬出隰州

隰州場太祖時以地接河

東境罷之太平興國三年邳州牙吏卜
美請募工造鑪煮礬輸官課詔從其請
各置官典領有

鑪戶者造入官市晉汾慈州礬以一百四十斤為一駄

給錢六十

給見錢三之二
餘準以茶絲

隰州礬減三十斤給錢八百

汾州每駄三十四貫五百又增五百隰州每駄四貫六

百白礬汾州斤百九十二錢綠礬斤七十錢晉州折博

務額錢一十六萬貫許商人入中筭請生礬上京煎

煉賣與通商路分客人建隆三年禁私販幽州礬其

後定令私販河東幽州礬一兩以上私者礬盜官販者

胥重律後又命晉州制置砮務許商人輸金帛絲綿茶
及緡錢官以砮償凡歲增課八十萬貫淳化初有司
言國家以見錢償砮直商客以陳茶入博有利豪商
無資國用請今後惟以金銀見錢入博從之淳化元
年有司言慈州官砮滯積蓋小民多就山谷僻奧處
私煮以侵其利而綠砮價賤不可與晉州砮均法詔如
私茶例至道中白砮歲課九十七萬六千斤綠砮四
十萬五千餘斤賣錢十七萬餘貫慶厯元年河東

都轉運使於晉州置煉礬務官置鍋鏊自煉熟礬招客而六戶年額如故河東轉運使薛顏請晉慈礬一切入緡錢久之礬積益多復聽入金帛芻粟嘉祐六年復入緡錢礬以百四斤為一駄入錢京師權貨務為錢十萬七千入錢麟州又減三千熙寧七年知彭州呂陶言晉州有礬山民間煉者乃是私礬今川蜀茶園乃百姓已開物與晉礬事體不同神宗時隰州商尹奇賈溫泉礬有羨數云官潤之守欲械訊河東大理正

杜純曰奇情止爾若傳致其罪恐民無敢復貨礬則數
百萬之儲皆為土石請沒其羨而釋其人 元冀寧產礬
石炭 山西府州惟石炭不甚缺間有缺處亦以樵山較易於
鑿窟非因遼絕不可致而後易之以薪也俗稱煤炭有夯
炭微煙有肥炭有烟出平定者佳有煨炭無烟出廣昌廣
靈者佳精膩而細碎埋爐中可日夜不滅明陞深浮山遺
竈記山多產石炭勝他產出陽曲者置宜寒地遇暖則化
埋爐中亦可經久不滅 宋崇寧末官賣石炭增賣二十

餘場天下市易務皆官自賣 大同路煤炭課一百二十
九錠一兩九錢煤木所二千四百九十六錠二十四兩五錢
金天德二年野人採炭獲異香 明萬厯三十年十一月內官
奏山西煤窑每年變價五千兩有旨開取 張鳳翼晉國
賦冀北之煤連綿大麓斷礮石摩肩擊轂五方絡繹
以奔塗萬竈所煥而轉燠 日知錄今人謂石炭為石墨按
水經注冰井臺井深十五丈藏冰及石墨焉石墨可書又燃
之難盡亦謂之石炭是石炭石墨一物也有精麤爾 史

記外戚世家竇少君為其主入山作炭 後漢書黨錮傳
夏馥入林慮山中親突烟炭皆此物也北人凡入聲字皆轉
為平故呼墨為煤而俗竟作煤字非也玉篇煤炲炭也韻
會煤炲灰集屋者呂氏春秋孔子窮於陳蔡之間七日不
嘗粒晝寢顏回索米得而爨之幾熟孔子望見顏回攫其
甑中而食之選間食熟謁孔子而進食孔子起曰今者夢見
先君食潔而後饋顏回對曰不可嚮者煤室入甑中棄食
不祥回攫而飯之高誘曰煤室烟塵之煤也素問黑如炲

者死註謂良煤也唐張祐詩古牆丹雘盡深棟黑煤生

李商隱詩敵國軍營漂木柿

方畧反按說文當作柿削木札樸也後漢書方術楊方傳

風吹札柿

前朝神廟鎖烟煤溫庭筠詩烟煤朝奠處風雨夜歸

時是煤乃梁上烟煤之名非石炭也崔銑彰德誌作煇志

曰安陽縣龍山出石炭入穴取之無窮取深數百丈必先見

水水盡然後炭可取也炭有數品堅者謂之石軟者謂之煇

氣愈臭者燃之愈難盡云

水可煎磨終不若晉絳

按玉篇韻會並無煇字

朱弁坑寢詩西山石為薪黝色驚射目方熾絕可邇

將盡還自續飛飛湧元雲皸皸積紅玉稍疑雷出地又似風薄竹 于謙詩但願蒼生俱飽煖不辭辛苦出

山林

石灰 山谷有碎青石胥可用土人砌窑下為爐以炭與青石相間實之泥土上封如煉軋瓦狀縱火焚之炭灼而石自灰矣

瓷器 有黑白二種府州胥出凡盤盃器用胥極樸素有唐魏之遺風 元史冀寧磁課五十八錠 明晉

府置窑燒造充府用其白者類土定俗稱晉瓷

砂鍋 呂坤停止砂鍋疏查得陶器燒造地方止有儀

徵瓜州河南正定江西五處其器止有瓶罈瓷甕等

件並無所謂山西砂器者卷查嘉靖三十九年坐派

潞安府砂器五千個四十年坐派一萬五千個萬曆

十六年坐派一萬五千個

白菜 芹菜 山藥 芥菜 苜菜 莧

韭 蒜 芹 蒿苳 茗蓬 蘿蔔

薺

王瓜

冬瓜

南瓜

北瓜

甜瓜

菜瓜

絲瓜

匏瓜

石榴

杏

沙果

李

雞

石雞

鵝

雁

鶩

青鶩

鶩

鵲

烏

鴿

燕

鳶

鳩

黃鸝

鷓鴣

布穀

啄木

鴉

爵

鴉

蝙蝠

牛

羊

騾

驢

豕

狗

麕

鹿

麋

鹿

狐

獾

狼

貓

鼠

鹿茸

連翹

升麻

黃芩

枸杞

薄荷

荊芥

益母草

遠志

白頭翁

菖蒲

車前子

地骨皮

牡丹

芍藥

玉簪

鳳仙

山丹

薔薇

丁香

碧桃

茨梅

杏花

李花

梨花

水紅花

石榴花

雞冠花

葵

萱草

柳

垂柳

桑

楊

楸

蔡

椿

蜂

蟬

蟋蟀

螽斯

蝶

螢

螳螂

蛇

蜈蚣

蟾蜍

蜥蜴

蝮蠋

守宮

蝮

百足蟲

蝸牛

金銀 舊傳太原太平澤潞等山出金銀礦明萬厯中遣中使開採大率礦砂一斤得銀三五錢不等亦有全無所得者計其工費不啻倍蓰礦亦隨竭

國朝康熙四十六年陽曲縣民高弘化等勾黨叩閭指稱太原等處有金礦銀礦銅礦每歲願輸戶部銀二十萬兩自備人工開採下部行查巡撫噶禮將康熙十四年以後歷年卷案均屬挖取無砂久奉封塞

題覆高弘化等復行瀆奉

聖祖仁皇帝命戶部郎中赫都押解高弘化等十人至晉
同巡撫地方官踏勘是年九月戶部赫巡撫噶布政
使永泰赴繁峙應州等處開挖無驗十一月赴聞喜
衛坡即弘化等所稱魚坡彎者開挖三晝夜得銅砂
二十斤又赴夏縣溫峪山開挖三晝夜得銀砂二十
餘斤面同部員封固還省覓匠煎煉所採銀砂並無
銀色銅砂雖有銅星不成分數遂將高弘化德哥等

交部員押解回京覆奏奉

旨高弘化議罪發落礦洞永行封塞

太原府

稻米 出太原晉祠者佳宋梅堯臣晉祠詩稻苗耙耨
曾不枯歐陽修詩稻花漠漠灌平田 米潔白纖長
味殊精美明蘇祐詩飯熟香粳入王瓊詩蒲茁炊香
晨饌美皆謂此也

鹽 太原諸屬水性土脈多鹹遠望之似水近即之似

積雪人率刮取實水池中於池前埋小甕以濾鹽汁
汁成入鍋煎三晝夜鍋得鹽可斗許色微黃所謂天
生曰鹵人生曰鹽者是矣徐溝水土差甘鹽率繇井
水取味鹽井又尠有鑿井得鹽泉者置地畝餘為土
場汲水洒土得日晒水味入土乃濾鹽汁雨濕則味
退必再洒再晒乃注水濾汁如前而汁之淡者仍置
之煎一晝夜每鍋得鹽可七升土人名小鹽又名末
鹽明李敏疏曰太原地瘠不毛者強半人皆瀝土取

鹽以供賦稅雖得微末利然艱苦亦已甚矣

硝 取鹽之渣滓再加煎煉遂成硝工部歲採買無定額太原硝皆出人力貧民借以自活唐常貢歲貢硝石五十斤

硫黃 出陽曲西名村居人入山取礬置砂礪中以火煉之融注磁盆一餅約重十斤工部歲採買亦無定額古志塞表之地有硝而無礬東倭之國有礬而無硝兩廣川貴之地亦間有其一而不得兼故皆不得

火器之妙惟汾晉兼而有之故用之以為長技邱瓊
山火藥議宋太祖時有火箭真宗時始有火毬之名
然或假木箭以發未知是今之火藥否今之火藥用
硝焰硫黃柳炭為之硝之名見於本草漢張仲景方
論中已用為劑則是漢時已有矣硫黃自海舶上來
唐以前無此也

羊皮 諸屬胥產

絨毛 交城差多收市者織為氍毹戎布以代羊裘

并剪 唐杜甫詩安得并州快剪刀剪取吳淞半江水
今按察司署西有大小剪子巷

并刀 唐盧綸難綰刀子歌并州難綰竟何人每成此
物如有神

絹 出陽曲元史冀寧路織染提舉司置提舉一員同
提舉一員副提舉一員照畧案牘一員

墨 金史太原府有造墨場今廢

銅鏡 唐常貢太原府歲貢銅鏡二面今無

鐵鏡 喬琳太原進鐵鏡賦晉人用鐵今從革無方其
或五金同鑄百鍊為鋼雕鐫而雲龍動色磨瑩而冰
雪生光爛成形於寶鏡期將達於明王

桑落酒 王元美曰太原酒頗清醇而不甚醖難醉易
醒余嘗取其初熟者以汾州羊羔劑半嘗之瀉水晶
杯不復辨色清美為天下冠 宋雨公曰徐文長集中
酒三品一曰桑落即太原酒也宗藩東玉家尤勝
依韻成詠寒暑無瓊味雪中獨酒香又曰價出王孫

重人迷客子鄉 桑落又名索郎見陸放翁詩 宋

謝枋得碧湖雜記杜詩云坐開桑落酒來把菊花枝
按賈思勰齊民要術造酒門桑落酒神麴酒其名不
一有造桑落酒麴法老杜或本諸此

汾清 齊武成帝在晉陽手敕河南王孝瑜曰吾飲汾
清三盃勸汝於鄴酌兩盃

玉液 宋張能臣酒名記河東太原府玉液

西瓜 蕭翰使西域得種歸今出榆次中郝東郝西

郝三村一種黑皮黃瓢絳子一種綠皮紅瓢黑子子
有文名刺麻瓜一種綠皮紅瓢紅子名蜜瓜味殊甘
美今以入貢陽曲劉璋榆瓜賦序其種得之刺麻其
地得之榆次其圓如日其大如斗色如胭脂味如瓊
漿其子之文如古鼎之篆文焉榆次王系詩肉含紅
瑪瑙膚映碧琉璃

蒲桃 產清源文水太谷者佳有馬乳水晶雞心紫
蒲桃諸種魏文帝曰中國珍果甚多蒲桃當其夏

未涉秋尚有餘暑醉酒宿醒掩露而食甘而不飴脆
而不酸冷而不寒味厚汁多除煩解倦釀以為酒甘
於麴蘖善醉而易醒 儀同三司趙郡李元忠曾貢
齊文襄蒲桃一盤文襄報以百練縑遺書曰儀同位
亞台鉉識懷貞素出藩入侍備經要重而猶家無擔
石室若懸磬皆輕財重義奉時愛已故也久相嘉尚
嗟咏無極恒思標賞有意無由忽辱蒲桃良用佩戴
聊用絹百匹以酬清德 唐白居易獻北都留守裴

令公燕姬酌蒲桃詩注蒲桃酒出太原 北漢再遣
使進蒲桃酒於遼 明高啟太谷蒲桃酒詩赤霞流
髓濃無聲初疑豹血淋銀甌 王翰詩甘漿細挹銀
泉出淺沫輕浮絳雪明

桃 陽曲石漕者佳石漕西山深奧處汾水所經也山
可樵水可釣地多仙人蹟故桃為獨盛

鯉魚 出汾河明謝肅詩却把釣竿來沮洳掣得鯉魚
長尺許又曰碎魚為美甘且鮮神物儘可收饒涎

鯀魚 出太原山海經曰懸甕之山晉水出焉其中多
鯀魚明張采詩檐前冰沼細生鱗 懸甕山亦名汲

甕山

湖魚 出清源知縣儲方慶東湖記縣故無湖曩白石
水漲不獲以時疏導悉歸城東窪下處外障於墻垣
而內益以泉水故聚而成湖居民樂有魚鼈之利而
幾忘其為城郭廬舍之害矣邑人王象極有湖魚詩
半痴 小鳥土人名半翅徐文長集作半痴因其性也

青眉 出奇嵐

馬 趙吉士曰交州米家溝惠家莊鍾家溝一十八村
與靜樂石峽接多產良馬即屈地也又朱彝尊誌交
城地近屈產良馬絕有力 潘耒四望樓詩利鐵錮
重巖健馬嘶風哀 李翰名馬記唐開元十二年太
原獻異馬駒其耳如筒左右十二肋肉尾無毛

龍骨 山巖土穴中處處有之造化權輿曰龍易骨
蛇易皮麋鹿易角螻易螯 本草曰雄者骨粗而

文狹雌者骨細而文廣五色具者上黃色白色者中
黑色者下 唐常貢太原府歲貢龍骨三十斤

麝香 唐常貢樓煩郡歲貢麝香十顆即今岢嵐州也

蟾酥 太原府賢輔鄉有蟾酥池元時採辦於此今涸

膠香 金太原府貢白膠香 本草味辛苦無毒即

楓香脂也

蒲菊粉屑 唐常貢

柏子仁 唐常貢

五靈脂 金太原府貢五靈脂

松脂 金太原府貢松脂

葶蘆 出祁縣月令仲夏之月靡草死即葶蘆也

射干 出陽曲即仙人掌

大黃 金太原府貢大黃

白芥 生太原河東亦有之 王徵農書葉如芥而白

氣味辛烈菜中之介然者有之有剛介之象

天門冬 晉李當之藥錄甘始者太原人服天門冬在

人間三百餘年天門冬莖間有茨而葉滑曰郗體一名顛荊根以浣素縑似天門冬而實非也

甘草 唐常貢太原府歲貢甘草三十一斤

地脂 唐馮贄雲山雜記高展為并州判官一日見砌間沫出以手撮之試塗一老吏面皺皮頓改如少年色展以問承天道士答曰此名地脂食之不死展乃發輒已無所覩

磁石 即吸鐵石出交城

爐甘石 出太原澤州陽城高平靈丘諸處亦有之
本草注金銀之苗也九天三清俱尊之曰爐先生

李時珍曰爐火所蒸其味甘故名

白竹 榆次昌源河之濱人多種竹雲梢修纖不綠
而白如雪

長生蘋 出太原縣朱彞尊詩琤琮難老泉分流注
蒲稗中有長生蘋葱菁儼圖畫又曰蘋號長生水
難老

松柏 周禮冀州之利曰松柏晉榆次孫綽齋前種一株松恒自守護鄰人曰樹子非不楚楚可憐但恐永無棟梁日耳綽答曰楓柳雖復合抱亦何所施耶

荀子曰桃李榮於一時時至而後殺至於松柏經隆冬而不彫蒙霜雪而不變可謂得其正矣此為晉先賢贊也

山木 交城多山而樹藝甚艱民蓄木以代耕舊設厰武元關前後厰廢知縣趙吉士請於水泉灘仍立厰

焉

槐 晉陽都城北有槐一株一日三榮三悴

銅 出嵐縣銅爛溝土人取石洞中煎之成銅因名銅

家塢今無

琉璃 出陽曲交城山中有礪石色微紅不甚堅硬土

人取搗成末如煉硫磺法煉成以為簪釵環紐之屬

五色胥備間有用以製燈者今府南關有琉璃店

魏世祖時大月氏國人商販京師自云能鑄石為五

色琉璃於是採礦山中於京師鑄之既而光澤美於西方來者乃詔為行殿容百餘人光色映徹觀者莫不驚歎以為神明所作自此中國琉璃遂賤人不復珍之

白玉石 金太原府貢白玉石今無

瑪瑙石 金太原府貢瑪瑙石

銀 金史太原府有煉銀洞今無

平陽府

綿紙 以麻為之有尺樣雙抄諸名臨汾襄陵出

絹 府志出襄陵 元史襄陵翼城各有織染局局設

提領一員副提領一員胥屬晉寧路晉寧路織染提
舉司提舉一員照畧案牘一員

帕 臨汾襄陵出

銅 曲沃紫金山舊產銅金為銅母故以為名 唐地

理志翼城有洞源翔臯二坊翼城蜀山縣志書漢文
帝賜鄧通鑄錢地非也 元至元五年立平陽等路

提舉銅冶司

國朝督理錢法田六善疏臣聞直隸邢臺內丘沙河及河南之涉縣一帶山西之絳縣曲沃垣曲夏縣以及太行山西南隅一帶皆有銅臣不知凡幾但山內之物時有時無宜任民採取有銅則稅之無銅則聽之又聞紅銅六分入白鉛四分則有光色白鉛出於山西亦時有時無之物所出州縣照銅收稅亦足資鼓鑄之用

蠟 唐常貢平陽郡歲貢蠟燭三千條

釀 府縣多產元史晉寧產硝釀歲課二十六錠七兩

四錢

酒 河東劉白墮善釀六月以甕酒曝於日中經旬味

不動而愈香美朝士千里相饋號曰鶴觴一名騎驢

酒今惟楊寡婦家獨勝劉龍故人寄襄陵酒詩注襄

陵酒美人皆知之第以山路險阻難以達於京師故縉

紳非宦游晉中者鮮得嘗其風味 正德初西涯當國

遼老柄銓二公嘗評此酒為天下第一 王世貞酒
品前後二十絕題襄陵酒色黃白香醲而所致者多
過甘不堪醕獨趙兵巡齋兩醕味極殊絕屢白不厭
以無甘味故也

乾和 桃博 宋竇草酒譜酒之名最古於今不廢唐
人言酒之美者有河東乾和蒲東桃博

瓠 潘岳間居賦河汾之實有曲沃之懸瓠焉崔豹注
懸瓠可為笙出曲沃者善

冬韭 出襄陵居人以石為小堤導水其中架以木雜以葭葦覆肥壤於其上入冬韭乘暖氣生莖甚壯味視夏秋尤美

藕 臨汾襄陵洪洞趙城胥產

莫 魏風彼汾沮洳言采其莫傳莫菜也疏莫莖大如箸赤節節一葉似柳葉厚而長有毛刺今人縹以取繭緒其味酢而滑始生可以為羹又可生食五方人通謂之酸迷冀州人謂之乾絳河汾之間謂之莫

桑 魏風彼汾一方言采其桑

蕢 魏風彼汾一曲言采其蕢傳水鳥也疏一名牛脣
如續斷寸寸有節拔之可復生其葉如車前草大其
味亦相似徐州廣陵人食之

棗 太平志邑宜棗往時樹盈野公私賴之邑人有半
年糧之謠 曲沃志出晉城者視他處特重投水則
沈名晉棗 方域考曰城西多沃壤棗大如瓜 翼
城志果惟棗最多有馬牙棗長一寸有紫棗圓如鈴

又名核桃文有川乾棗有酥棗墜地則碎

柿 趙城洪洞獨多入秋販市者相屬於道 曲沃紫
金山志山麓宜柿秋深霜清萬葉流丹林中墟落錯
互巖岫間望如赤城矣 翼城志有牛心柿有杵柿
有蓋柿而蓋柿最大

菸 曲沃志沃舊無此種邑人張士英自閩中攜歸明
季民窮賴此少有起色名曰烟酒可以已寒療疾晉
人種煙草昉於曲沃今則并代汾潞胥盈望矣

魚 出臨汾者迥異凡品劉聰觀魚於汾水以燭繼晝
鷄 唐高宗獵於苑中將軍史興宗言晉州出好鷄劉
齊賢見為司馬請使捕之上曰劉齊賢豈覓鷄人耶
蠟嘴 出趙城其喙如蠟故名

丹砂 翼城舊志丹山樵者雨後往往獲丹砂故以名
山今無

石膏 出靈石石膏山舊志山與尖陽山對峙峰巒壁
立谿壑幽深多產石膏且佳

芫花 出浮山黃花嶺

牡丹 綿山介廟紅花中間出白花一朵人以為神賈
鳴璽綿田紀游詩塔前離披看牡丹變化靈異絳雲
護

龍女髮 出翼城石姑山山有草生石縫中葉似莎長
四五尺遇旱梳之則雨土人名龍女髮舊志昔有龍
女至此故名

直棘 趙城西北許村有藺相如墓棘刺無曲鉤知縣

賀定國曰銳似懸針剛如直挺

玉 出臨汾平山 山海經曰平山平水出於其上潛
於其下是多美玉 又出霍州霍山 爾雅曰西方
霍山多珠玉今無

潞安府

秬黍 出長子縣羊頭山其色至烏其形圓重累百滿
尺可以累律非其地則不驗 漢律厯志以上黨羊
頭山黍度之為尺以定黃鐘 明嘉靖間採之定樂

律

國朝初亦遣使取焉

紬 明萬厯中詔潞安進紬二千四百疋未幾復命增
五千工科都給事中澤州張養蒙率同官力爭曰從
來傳奉者織造具題者內臣擬旨者閣臣抄發者科
臣今徑下部非祖制不從 呂坤停止潞紬疏山西
歲派止有綾絹各五百疋閏月共加八十六疋並無
所謂山西潞紬者卷查萬厯三年坐派山西黃紬二

千八百四十足十八年坐派黃紬五千足

酒 元宋伯仁酒小史潞州有珍珠紅 王世貞酒品
潞州鮮紅酒蓋燒酒也入口味稍美易進而作劇吻
咽間如刺或曰即葡萄酒遺法也

赤銅 山海經白馬之山其陽多石其陰多鐵多赤銅
今間造赤銅器

慈 劉禹錫傳信方崔給事云頃在上黨與李抱真相
公作判官李相公以毬杖按毬子其軍將以杖相格

因傷相指爪角劈裂裏金創藥飲酒顏色愈青痛不止有軍吏教以取葱新折者煑火煨熱剝皮有涕便罨損處仍多煨續續易之三易面色即赤斯須不病筆管菜潞志拾遺筆管菜即黃精苗所謂薇也芽形似筆黎人以筆頭呼之

松心墨 拾遺四譜上黨松心為墨曰隃糜極佳 段成式送溫飛卿書隃糜松節絕已多時予髻時猶觀陵川宗侯所製龍墨色味俱長

精衛 出長子發鳩山 山海經發鳩山多柘木有鳥
馬狀如烏文首白喙赤足名曰精衛其鳴自詒是炎
帝之少女名曰女娃遊於東海溺而不返故為精衛
常啣西山木石以填東海

鷗 漢書音義上黨猗氏縣出鷗 徐廣曰鷗似黑雉出
於上黨 後漢志鷗者勇雉也其鬪對一死乃止故
趙武靈王以表武士秦施之冠加雙鷗尾豎左右為
鷗冠名武冠 師古註鷗與鵠同集韻音分蓋一物

而二名也

澤馬 李翰名馬記宋志魏黃初中上黨澤馬

虎 攝虎碑刁黃山有虎啞人唐長子令崔元靖遣首
吏孟完齋牒往攝之虎啞牒而至元靖數其罪當刑
虎觸階死

豹 出長治長子 山海經有元豹詩有赤豹尾赤而
文墨也爾雅有白豹即貘也毛白而文黑郭璞注貘
能食銅鐵

人參 隋書五行志開皇中上黨有人宅後每夜有人
呼聲求之不得去宅一里許但見人參一本枝葉峻
茂因掘之其根五尺具人體狀呼聲遂絕 唐常貢

上黨郡貢人參二百小兩 金潞州貢人參 明紀

高帝曰朕聞人參得之甚艱豈不勞民今後不必進
如用當遣人自取因謂省臣曰朕飲酒不多太原進
葡萄酒自今亦令其勿進國家以養民為務豈以口
腹累人哉嘗聞宋太祖家法子孫不得於遠方取珍

物甚得貽謀之道也 上黨人參產石間沃壤一名

人銜一名神草大者徑尺小者六寸 本草圖經人

參大治喘相傳試上黨人參者使二人同走一與人

參含之氣自如不含有則喘 本草注高麗人作人

參讚云三桮五葉背陽向陰欲來求我椶樹相尋

人參產壺關紫團山者為紫團參唐韓翃送客之上

黨詩曰官柳青青匹馬嘶迴風暮雨入銅鞮佳期別

在春山裏應是人參五葉齊又周繇以參遺段成式

詩曰人形上品傳方志我得真英自紫團慚非叔子
空持藥更請伯言審細看蘇東坡紫團參詩谿研土
門口突兀太行頂豈惟團紫雲實自俯倒景剛風被
草木真氣入苔蘚舊為人銜芝生此羊腸嶺按紫團
山舊有參園後墾為田其他山谷雖產參然服之尠
効

梔菰 廣志上黨梔菰小而甘

瓦松 本草稱葉何草生上黨屋上如蓬初生高尺餘

遠望如松栽酸平無毒生眉髮治金創已沙淋通女
子經絡

五靈脂 出黎城平順等山有鳥如雞四足肉翅其矢
名五靈脂夏月毛采五色自鳴鳳凰不如我冬寒毛
墮號曰得過且過山中得其撒矢處用索縛腰下岩
以利刀鑿取或多至三五百斤 丹鉛錄謂寒號蟲
即鷓鴣非

長理石 名醫別錄長理石如馬齒方而潤澤玉色生

長子山谷性苦寒無毒

石脂 宋蘇頌曰白石脂赤石脂惟潞州有之味甘平療疾甚多

石膏 出壺關趙屋嶺者佳

地錦草 一名草血竭一名雀兒卧草潞人稱小蟲卧草

蓮 潞屬諸邑胥有之

白菊 黃白二種佳抱朴子曰苗可以菜花可以藥囊

可以枕釀可以飲 唐草方圖白菊上黨及建安順
政郡並名羊歡草 又菊有五美賦圓花高懸準天
極也純黃不雜后土色也早植晚發君子德也冒霜
吐穎象勁直也杯中體輕神仙食也

榛 出長治潞城壺關

梏 陸機疏梏似荆而赤莖似著上黨人織為牛管箱
器又揉以為釵故上黨調問婦人欲買楮石否謂竈
下自有黃土問欲買釵否謂山中自有梏

松 後漢書上黨記邑帶山林茂松生焉 李太白詩

上黨碧松烟 唐志五龍山有松樵採者罔敢睨名

龍山松

栢 明一統志山與太行王屋相接多栢稱為栢谷

樺 出長治黎城其根有花可作酒器

榆 先生葉後生莢三月落如小錢其木甚堅 陸機

云榆類十餘種葉皆相似皮及理異 漢建安十八

年魏公使梁習於上黨取大材供鄴宮室

汾州府

布 唐常貢昌化郡歲貢布五端今永寧州也

蠟 唐常貢文城郡歲貢蠟二百斤今汾州

酒 有羊羔玉露豆酒火酒之名羊羔玉露尤美宋張

能臣酒名記有汾州甘露堂 王世貞酒品曰羊羔

酒出山西汾州孝義等縣白色瑩徹如冰清美饒風

味遠出襄陵之上少挾羶氣耳

磨菇 出孝義汾州介休一名羊肚永寧鄉出

芑 陸機疏芑菜似苦菜莖青色白摘其葉白汁出肥
可生食亦可蒸為茹青州謂之芑西河雁門芑尤美
鯉魚 出汾陽介休永寧州脊中鱗一道自首至尾無
大小皆三十六鱗每鱗上有小黑點能飛亦魚中神
品也

鯽魚 出汾陽介休形似鯉體促脊隆又名鯖魚
鷺鷥 出孝義頭有黑毛如絲一名屬玉

落浦 出平遙

獐 出汾陽孝義似鹿而小無角

蘋果 味美而體鬆熟至八九者者佳

櫻桃 一名含桃相傳鶯鳥所含先百果而熟 禮記

仲夏天子羞以含桃先薦寢廟 漢明帝宴羣臣

大官進櫻桃以赤瑛盤賜羣臣月下視之與盤同色

今長安含桃始敵晉產耳

甘草 出河西山谷一名蜜草一名國老 陶弘景曰

此草為衆藥之主國老即大帥之稱能安和草石而

解諸毒 甄權曰甘草治七十二種乳石毒解一千二百種草木毒調和衆藥故有國老之稱

柴胡 一名地薰出汾陽孝義永寧味殊芬本草柴胡香直上雲間聞者皆氣爽又曰解散用北柴胡最良

三七 唐汾州貢三七今無 李時珍曰人言其葉左三右七蓋本名山漆謂其能合金瘡如漆黏物也

菝葜 出汾陽介休俗稱窮參 宋張詠嘗表進

備述其少壯穉老之味

石膏 出汾陽介休孝義唐常貢西河郡貢石膏五十

斤

白牡丹 開元末裴士淹使幽冀至汾州衆香寺得白

牡丹植長安私第為都下奇賞

木蘭 叢生谷岍葉可染皂晉人名黑葉子春初採芽

作茹名木蘭芽

龍鬚草 唐常貢西河郡貢龍鬚席十領古今注龍

鬚草一名縉雲草 晉東宮舊事太子有獨坐龍鬚

席今無

烟草 州縣間出而味遜曲沃

檜 出汾陽寧鄉永寧 爾雅檜栢葉松身 字說栢

葉栢身葉與身皆曲

桐 出汾陽介休孝義一名白桐體最輕虛不生蟲蛀

斲琴最良一名青桐即梧桐也其子可炒作果立秋

日必墜一葉詩云梧桐一葉落天下盡知秋

黃堊涅石 山海經孟門之山其下多黃堊涅石

大同府

龍 元史大同置織染局大使一員副使一員照畧案

牘一員 天成亦有織染局

油 元大同歲辦油麪輪上都生料庫供奉內府

葡萄酒 富珠哩翀姚天福神道碑任懷仁為縣史元

世祖以太弟駐白登公從縣以進葡萄酒見而奇之

畱侍宿衛

青鎖鐵 金雲內州貢青鎖鐵今廢

鴻鵠 出大同縣

鷹 唐段成式肉攬部代都赤紫背黑鬚白睛白毛三斤半以上四斤以下便兔生代州赤岩裏向靈丘中山白礪飛 漠北白身長大五斤有餘細斑短脰生沙漠之北一名西道白向代川中山飛 白皂驪大者五斤漁陽白道河陽漠北所在皆有生枯栢樹上便鳥向靈丘中山范陽章武飛 青斑大者四

斤生代北及代川白楊樹上細斑者快向靈邱山范
陽飛

羊 元大同食羊軍課三百九十三錠羊市二百二十
九錠二十九兩七錢

黃鼠 出大同縣 劉績霏雪錄黃鼠穴處各有匹
配人掘其穴見其中作小土窖若牀榻之狀則牝牡所
居處也秋時蓄黍菽及草木之實以禦冬天氣晴
和時出坐穴口見人則拱前脰如揖狀即竄入穴惟畏

地猴地猴形小縱入其穴則喙曳而出之味極肥美元時曾為玉食之獻置官守其處人不得擅取也

白駝 金大同貢白駝

栗 出應州廣昌二縣

地蕈 金大同貢地蕈

松膏 金大同府貢松脂松明 蘇東坡偃松屏贊子

為中山守始食北嶽松膏為天下冠其木理堅密瘠而不痺信植物之英烈也

安息香 金大同貢安息香

獨活 出應州 本草一莖獨上不為風搖故名 西

京張天錫小名獨活

山查 元大同路山查課三十三錠四十五兩七錢今

無

黃連 金大同貢黃連 本草李時珍曰其根連珠而

色黃故名 王微黃連贊黃連味苦左右相因斷涼

滌暑闡命輕身縉雲昔御飛蹕上旻不行而至無聞

其人

神護草 神農本草恒山有草名神護置之門上每夜
叱人 物類志護門草取置戶下或有過其門者草必
叱之一名百靈草 王筠寓直詩霜被守宮槐風驚
護門草

神草十九種 道書福地記恒山有方泉神草十九種
服之可以度世

蓬蓽 列仙傳道士昌容自稱殷女食蓬蓽根往來山

下三千餘年顏色如二十許人

苜蓿 出大同天鎮應州 史大宛傳馬嗜苜蓿 漢
張騫使大宛求葡萄苜蓿歸因產焉 陶隱居曰

長安中有苜蓿園今止用之以供畜芻

雙離 即榆樹也楊述程登恒山記繇紫芝峪山迴路
轉古榆數千百章歲莖蓊茂最大者名雙離樹株
可蔽牛而蒼枝連理若虬龍軒舉之狀人以為果
老繫驢樹云

不灰木 廣昌出者佳

碾玉砂 舊出府境 金志大同路貢碾玉砂 宣寧
產元志大同路採砂所 至元十六年置管領大同
路撥到民一百六戶歲採磨玉夏水砂二百石起運
大都以給玉工磨礪之用大使一員今廢

天冰 出廣昌廣寧等山塊粒如石腴理薄似紙層
層剝之表裏精瑩如玻璃水晶狀然脆而不堅土
人但以映窗令內外明照云

花班石 出廣靈廣昌靈丘

凝水石 即寒水石生山谷中本草註石體與水同色
凝而不動故名

石綠 金時充貢今官山西乃石綠山也

朔平府

花毯 元朔州毛子局大使一員豐州毛子局秩正七
品大使副使各一員典史司吏各一人管領豐州捏
只局頭目一員掌造織花毯 至元十七年置豐州

雜造局秩正六品達魯花赤大使副使各一員

馬皮 唐常貢安北都護府歲貢生野馬腓皮二十一
斤

白鵬翎 唐常貢馬邑郡貢白鵬翎五具 顏師古曰
鵬大鷲鳥也一名鷲黑色翎可作箭羽 杜少陵鵬
賦降精於金立骨如鐵目通於腦筋入於節有觸邪
之義焉 朔平地近塞故多產

鹽 縣志非官鹽也地砂鹵不成田者起土煎之名曰

小鹽計鍋納課

三稜 金朔州貢三稜

荆 金朔州貢荆

枸杞 金朔州貢枸杞

劈蘭 一名玉蔓菁根如碗大

蕨菜 出朔州

黃精 出平魯 李時珍曰黃精為服食要藥仙家芝

草之類以其得天地之精粹故謂之黃精

鰍魚 桑乾上流有之巨如指長二寸許土人砌碎石於河壁由闊而狹置柳罩於壁口月明魚順流下輒取之

畫眉 出朔州狀如雀頭白眉黑其翅尾亦黑白相間地榆 五縣胥產本草其葉似榆而長初生布地故名花紫黑色如豉故又名玉豉

黃芩 本草北芩多內實而得黃即今所謂條芩也

唐渤海郡王高固少為渾瑊所養名曰黃芩瑊家河

曲

知母 五縣胥產 李時珍曰宿根之旁初生子根狀如
蛻蝨之類故謂之蛻母俗訛為知母

桑 出朔州馬邑

寧武府

穉麥 皮肉相連似稻土人謂之草麥造麴為之亦有
碾其皮以食者山西皆產寧武尤饒

千穗穀 高四五尺葉闊而尖苗帶赤色其莖可作杖

葉旁皆穗故名子碎小光滑黏而可食

雲爪 出偏關大如西瓜皮有花如雲去瓢煮食之

蘆芽 出蘆芽山嫩可食類笋根入香料

慈老 徐化溥詩引塞上一種似雁非雁偕雁往來本

草云慈老箸爪修喙翎毛風來颯颯可觀

秦艸 出偏關一名秦紉其根土黃色而相交糾故名

葭若子 始生海濱川谷及雍州今寧武多有之莖高

二三尺葉似地黃王不留行紅藍等花紫色莖有

白毛結實如小石榴最有毒服之令人狂浪故名茛
菪 李時珍曰嘉靖四十三年陝西妖僧以毒中昌
黎張柱令其狂惑殺全家十六人即茛菪子也

曼陀羅花 本草花生北土故寧武多有之一名山茄
子綠莖碧葉高四五尺花如牽牛朝開夜合實如葚
麻有刺 李時珍曰相傳此花笑採釀酒飲令人笑
舞採釀酒飲令人舞又八月採花七月採火麻子花
陰乾等分為末酒服頃則昏昏如醉割創炙火不覺

其苦

金土 石所化也色類金繪工取以絢采

五色石 斑斕可玩出蘆芽山 魏時亮節財疏時有

言山西出五色石者明成祖曰兵革災荒小民困苦
今何可以此困苦之官府求一物即百姓受一害矣

澤州府

帕 府境產絲織成素帛以橡殼皂之謂之烏綾帕用
以抹額

紬有雙線單線兩種鳳臺高平胥產

鉛出鳳臺說文青金也有銀坑處產之澤無銀坑而特有鉛

錫礦出沁水縣西鄉民多盜取常封禁之明萬厯間遣使開採即舊地鑿之數月迄無所得乃罷

青田田王世隆禽語詩序楚辰山中有鳥四五月則鳴其聲大而亮土人譯之曰乾柴乾楠晉地則名曰青田田而譯其音以為蠶者防火其實本一鳥而楚

人重竹木晉人尚蠶故因其地與其時之所急而託名以警人也

獲尸子中黃伯曰我左執太行之獲右執彫虎

枳棋蘇譚曰一名水蜜又名拐蜜陽城南山谷有之形屈曲如珊瑚味甘如蜜禮婦人之贄棋榛脯修即此

人參唐常貢高平郡歲貢人參三十斤味性與潞同詳見潞產

龍鬚草 唐常貢陽武歲貢龍鬚席六領

茅香 本草遼澤州充貢三月生苗似大麥五月開
白花亦有黃花者

桑寄生 出沁水陵州 本草圖經山谷桑上處處有
之云是烏鳥食物子落枝節間感氣而生葉似橘而厚
軟莖似槐枝而肥脆三四月生花黃白色六七月結
實黃色如小豆大

藁本 本草李時珍曰古人香料用之呼為藁本香山

海經名藁炭

禹餘糧 澤州高平出

白石英 高平出唐常貢高平郡貢白石英五十兩

魏青龍中鑿太行之石英采穀城之文石起景陽山
於芳林之園

不灰木 出澤潞山中色青白可作刀靶火爐以紙包
裏蘸延安石腦油中油浸一年則照可一年

文石 出沁水板橋村今罕見

烏石 王佐博物要論烏石出澤潞山中純黑如漆細潤如玉性堅刀刮不動可作帶佩亦最難得

陶硯 襄陽米芾硯史澤州有呂道人陶硯以別色泥於其首純作呂字其理堅重與凡石等以澀青火油之堅響滲入三分許磨墨不泛其理與方城石等

蒲州府

棉花 出猗氏萬泉臨晉 南史高昌國有草實如繭繭中絲如細纒名曰白疊子國人取之織以為

布甚軟白即棉花也 通鑑梁武帝衣布衣木棉皂

帳 宋史照釋文木棉江南多有之春三月下種至
秋開黃花結實及熟時其皮四裂綻出如棉土人以
鐵鋌碾去其核取如棉者以竹為小弓長尺四五寸
許牽弦以彈棉令其勻細捲為筒就車紡之自然抽
緒如縑絲狀不勞紐緝織以為布

布 郝經言河東土產菜多於桑而地宜麻專紡績織
布故有大布卷布板布等自衣被外折捐價值貿易

白銀以供官賦

絹唐常貢河東郡貢綾絹扇四面今土人止織黃絹
無他技巧

蠶出猗氏臨晉產亦不繁

鯽魚諸魚屬火鯽獨屬土故有補胃之功以其性喜
偎泥不食雜物也蒲州於三晉為水鄉產滋衆

鮎魚無鱗大首偃額兩目上陳大口大腹有齒有胃
大者至三四十斤其涎黏滑不可耐故食鮎者先割

翅倒懸之則涎自流訖不黏滑也

酒 宋朱弁曲洧舊聞內中酒蓋用蒲中酒法也太祖
微時喜飲之即位後令蒲中進其方至今不改 張
能臣酒名記河中府有天祿又舜泉 王世貞酒品
曰蒲州酒清冽芳旨與羊羔並而不羶遠出桑落襄
陵之上

香油 出猗氏者佳名重直省

錫 隴西李濟翁資暇錄蘇乳煎之輕錫咸云十年

來始有出河中此武臣李環家之法也余幼於洛之
綏福里見之時新開一肆不數月滿洛陽開成初余
從叔聽之鎮河中自洛招致餽者居於蒲蒲因是有
餽

蔓青 出臨晉者佳一名蕪菁一名諸葛菜根長而白
形如胡蘿蔔 劉禹錫佳話錄諸葛亮所止令軍士
種此取其初出甲可生啖一也葉舒可煮食二也久
居則滋長三也棄不吝惜四也回則易尋而採五也

冬有根可食六也

薇 久食可延年 三秦記夷齊食薇三年顏色不

變 陸璣疏薇山菜也莖葉皆似小豆蔓生其味
亦如小豆藿可作羹亦可生食 屠本峻野菜箋可
茹可茹彼美有薇

苓 唐風采苓采苓首陽之巔傳大苦也

苦 唐風采苦采苦首陽之下傳苦菜也疏荼也陸
機云苦菜生山田及澤中得霜恬脆而美所謂董荼如

飴

葑 唐風采葑采葑首陽之東傳菜名也 陸璣疏葑

蔓菁幽州人謂之芥

棗 唐常貢河東郡貢棗八千顆今出積善村者最佳

宋蘇軾與蒲廷淵東河中永樂出棗道家所貴事

見真誥 唐有道士侯道華嘗得無核者三食之後竟

竊鄧太主藥上昇 元柳貫打棗譜大棗出河東猗氏

柿 有牛心柿大如牛心有鏡面柿圓平如鏡有朱柿

色深紅圓小而皮薄味尤甘美今以入貢

梨 有青紅黃三色唐常貢河東郡貢鳳棲梨三千五

百顆今無

白芷 本草注白芷生河東谷下澤如掌

石膽 本草石膽出蒲州大者如拳小者如桃栗擊之

縱橫解皆成疊文色青見風久則綠擊破其中亦青

如意草 一名箭頭草象葉形也夏間紫花似指甲草

而小有香土人嘗採蒸麥飯結實三稜似爪形如豆

大熟則殼分三角中各含子十餘粒如粟大色蒼黃
根似遠志味苦辛近醫多採葉陰乾以末塗惡瘡效
蠟梅有二種一狗蠅梅一罄口梅以與梅時開香又
相類色似蜜蠟故名蒲州三晉最南疆便作羅浮遠
想

楮 一名穀音媾一作構 陶隱居曰楮即構樹也有
雌雄二種雄者皮斑而葉無桹又三月開花長穗如
柳花不結實雌者皮白而葉有桹又亦開碎花結實

如楊梅汁能合朱砂為團名曰五金膠漆抽金貼金者皆用其汁

遼州

麻 三縣胥產實用壓油皮漚結繩農家恒參穀之一焉

羊皮 他地羊多牧於州故皮特多

紅鶴 似鶴而差小

麝香 其香有三自剔出者名遺香為第一 楊億談

苑麝性絕愛其臍為人逐急投巖舉爪剔裂其香就繫而死猶拱四足保其臍也 李商隱詩投巖

麝自香

人參 唐常貢樂平郡歲貢人參三十兩樂平郡今遼州性味與潞澤同詳見潞產

苦參 李時珍曰苦以味名參以功名又名地槐以葉形似槐也

白微 出遼州本草注根白色而微細故名

貫衆 出遼州一名鳳尾草 李時珍曰草莖如鳳尾
一本而衆枝貫之故草名鳳尾根名貫衆 廣雅謂
之貫節

金絲草 出和順 李時珍曰苗狀未詳或曰即落蘇
也

藜蘆 出遼州和順蘆之有黑皮者故名

無名異 出遼州和順

欸冬花 不懼霜雪至冬而花故名

鄧青樹 出和順東山取其枝入水五色畢現土人云
葉繁密則年豐葉疎稀則年歉

沁州

稔子 州境出

羊絨 三縣胥出

子規 出沁州沁源一名杜宇一名杜鵑博物志杜鵑
生子寄之他巢百鳥為之飼鳴曰不如歸去晉地亦
有萬里行人聞之輒慨

喫酒兒 出沁水白東谷詩引喫酒兒山禽也鄉里多有之

白眉 出武鄉

人參 性味同潞澤產 晉書載記石勒時所居武鄉北原下草木皆有鐵騎之象家園中生人參花葉甚茂悉成人狀

黃芪 一名黃耆 李時珍曰耆長也色黃為補藥之長故名 又黃耆本出綿上者為良故云綿黃耆今

圖經所繪憲州者地與綿上相鄰 好古曰綿上即

山西沁州

連翹 出沁源莖短而赤花細瓣色深黃土人採以為

茶

貝母 出沁源 名醫別錄貝母出晉地十月採根

暴乾

石菖蒲 州境出

旱蓮草 州境出一名旱藕 陳藏器曰旱藕生太行

山中狀如藕 一名黃昏張世南宦遊紀聞後山贈
二蘇詩曰一服黃昏酒即謂此也

橡實可食穀用染皂物潞澤製皂帕用此

白松 較他產尤高大 明張五典大雲寺三松說膚
理瑩膩如雪蓋山中萬松類然更有三松玉骨凌霄
瓊枝插漢視岱嶽五松密山白松尤異

平定州

布素不諳紡織明萬厯間壽陽知縣藍令始教之

織今產差盛

黑棗 州暨樂平產較紅棗小而圓即羊棗也

防風 州暨壽陽樂平產 李時珍曰防者禦也其功療風最要故名

沙參 出壽陽色白生沙地故名一名鈴兒草象花形也詩曰風吹不響鈴兒草

秋海棠 黃心綠葉朱絲多出娘子關開時紅膩 羅山舊傳女子懷人不至灑淚而生一名斷腸花

嬰石 山海經燕山多嬰石今壽陽縣也

忻州

醵 出定襄土多斤鹵居人刮而煉之既成錠鬻販四方業者頗衆元史歲有醵課

鹽 出定襄亦鹵土所煉者顆粒堅凝味亦純正較太原屬產頗佳

絨毛 靜樂殊多業羶者咸收之

鵠 出定襄其形似鷹又謂之鵠鷹

鴛鴦 飛鳴棲止兩兩相依出靜樂石峽水中

玃尾 唐常貢定襄郡貢玃尾十枚

馬 舊志屈產之乘出石峽今靜樂也

地笋 一名玉環俗名地畱兒

龍芽 出靜樂

棗果 魏武衛將軍奚康生迎接郁洲賜細御銀纏梨

一張并棗杏果面勅曰果者果如朕心棗者早遂朕

意

檣 州屬胥出性堅緻較諸木頗適用

蟾酥 定襄縣舊有池今廢

雲母石 太原府舊志特載

玉芝 藥品太原府舊志特載

代州

天花 出五臺清涼山菌類形如松花 宋陳仁玉菌

譜五臺天花甲群彙 明水樂五年六月內使李進

往山西採天花

國朝

聖祖仁皇帝詩靈山雨過萬松青
朶朶湘雲摘翠屏玉笈
重緘勅飛騎先調六膳進

慈寧

地花

芸臺

金莖

銀盤

香蕈 胥出五臺清涼山

蘑菇 于謙巡撫時當入覲有以手帕蘑菇線香為贄
例進者謙口占詩手帕蘑菇與線香本為民利反成
殃清風兩袖朝天去省得閭閻話短長遂草其弊

桃 代桃最美又名胡桃色白

酒 味醇而厚醖而清趙閒閒詩金波曾醉雁門洲宋
張能臣酒名記代州金波又瓊酥

白鵬翎 唐常貢雁門郡貢白鵬翎五具今無

鷹 唐段成式肉攢部荆窠白者短身而大五斤有餘便鳥而快一名沙裏白生代北沙漠荆窠上向雁門馬邑飛

雁 漢皇甫規鄉人有以賄得雁門守者罷歸見規規無他語惟問曰雁門食雁美乎

解鋸鳥 出五臺小而色黃飛最夥人不知為何鳥聞其聲如解鋸然故名

馬 古稱代多良馬

踈 山海經秦戲山有踈其鳴自訕通典踈見則歲豐

踈瑞物也時一見之識者亦希

蹙 爾雅注夏屋山有獸形如兔相負共行土人名蹙
呂氏春秋蹙兔後而鼠前 按夏屋山去州東北
三十里一名夏壺

山羊 出五臺

蟾酥 代州五臺崞縣舊有池今廢

肉蓯蓉 一名黑司命別錄肉蓯蓉生河西山谷及代
郡雁門 李時珍曰此物補而不峻故號從容 陶

弘景曰代郡雁門屬并州多馬處便有之言是野馬
精落地所生生時似肉作羊肉美補虛乏極佳

茯苓 出清涼山者極大而味平

藜蘆 出五臺黑色曰藜其蘆有黑皮裹之忌見甘草

金蓮花 一名金芙蓉一名旱地蓮出清涼山 金世

宗嘗幸金蓮川周伯琦紀行詩跋金蓮川草多異花
有名金蓮花者似荷而黃即此種也

鉢囊 土人名荷包相傳五百羅漢遺之化為此花

長松草 出五臺 蘇詩注五臺山有草藥名長松亦
名仙茅 李時珍曰長松生古松下根色如薺芫長
五六寸味甘微苦類人參清香可愛 張天覺集僧
普明居五臺山患大風眉鬚俱墮哀苦不堪忽遇異
人教服長松示其形狀明採服之旬餘毛髮俱生顏
色如故今土人以長松雜甘草山藥為湯煎甚佳

蘇轍長公詩注近世有患大風疾者自分必死入五
臺山遇一異僧以長松令服而兩眉再生云蓋觀世

音所化也

莎草 出代州圖經名水莎爾雅名莎結 李時珍曰
莎葉如老韭而硬光澤有劍脊稜五六月抽莖開青
花穗如黍子大者如羊棗 昔人傳有病疝者客於
代罽丸如碗腫脹作痛服藥不效夜冷薰草於牀下
冷甚苦疝起就火薰之痛可耐睡於牀醒則罽丸縮
八九矣問主人煬火之草則莎草也後疝發復薰之
竟大愈想疝乃肝經病寒勞惱怒則發而以通肝行

氣之火薰之自然血行寒散然有至理也

異草 五臺有三種一名曹臺一名雞足一名菩薩線
娑羅樹 出清涼山

聖祖仁皇帝娑羅樹歌娑羅珍木不易得此樹惟應月中
植想見初從西域移山中有人多未識海桐結藥松
栝形千花散盡七葉青山禽迴翔不敢集虛堂落子
風泠泠楚州遺碑今已偃我眉雪外雙林遠未若茲
山近可遊靈根終古蟠層巘繁陰亭午轉團圞迴睇

精藍路幾盤憑教紫府仙山樹寫入披香殿裏看

煖木 陸深燕間錄山西地寒陳汝止伯安兵備代州為

余言北上雁門更寒雲中更寒然煖木實產其間此陰
中陽也

白楊 令狐楚白楊廟記昔元魏高祖孝文厥初經營
繇此途出繫馬其下歇鞍於枝威靈所憑別白而在
既偃頓以附土又騰跳而架空如華掌蹠為鳥勢形
洎今朝中書令燕公說摹詠其事戶部侍郎吉公中

孚申而明之故迹彌顯高名益大為屏為圖播於海隅代人神之是以祠也

樺木 出五臺可作器皿

赭石 別錄出代州者名代赭俗呼土朱鐵

熟青 熟綠 唐常貢雁門貢熟青二十兩熟綠二十兩

礪石 郭璞傳礪石出雁門山白者如水中赤色今亦罕見

銅 一統志出代州鳳遊峪今閉塞

保德州

石花魚 北方魚中肥美第一幾駕南洲而上之

撞破頭雀 羽毛鮮潔頭有點紅故名

黑燕鴉 似燕而大似鴉而小黑色長尾有岐五更輒

鳴曰架格架格至曙乃止古有催明之鳥名喚起者

疑即此也農人候其聲則入田興作南人呼為鳳凰

皂隸江人呼為夏雞

登相子 沙地多生一名沙米作羹頗美

旨鷄草 州境出草如綬亦名文章草

自然銅 州天橋崖出

石燕子 州扒樓溝出

木鬲石 州境出細澤可磨硯

解州

荏 出夏縣蘇屬一曰豆名詩大雅荏苒旆旆

鹽 詳見鹽法類

朴硝 生鹽鹵地朴者本體未化之意出州水池中

相里棗 相里隸安邑古河東地也 別錄棗生河東

平澤 陶弘景曰世傳河東棗特異與青州江東臨沂

金城不同 漢文帝詔羣臣曰棗味美者莫若安邑御

棗 漢書安邑千株棗與千戶侯等 爾雅注御棗

甘美輕脆後衆棗熟即今所謂撲落酥也 晉郭義

恭廣志河東安邑棗長二寸 梁簡文帝詩已聞安

邑美永茂玉門垂 明初督民種棗以三百二十三

株上供歲徵鈔六十四錠有奇赴平陽府交納其不
種者戍之令初下民踴躍棗林櫛比獲利滋多後民
窮胥伐為薪間有存者亦非其舊今道旁遺坊題曰
御棗千株猶存 杜氏新書平虜將軍劉勲為魏武
所親貴震朝廷嘗從河東太守杜畿求大棗畿拒以
他故勲敗魏武得其書歎曰杜畿可謂不媚於竈者
也

海榴 出安邑者佳一名天漿 楊廷秀詩霧縠作房

珠作骨水晶為粒玉為漿

鴛鴦

出安邑

古今注鴛鴦水鳥似鳬毛有文采本

草交頸而卧其交不再雌雄未嘗相離

李義山詩

池塘漸暖蒲堪結兩兩鴛鴦護水紋義山久居晉故引之

雉

出夏縣

禹貢羽畎夏翟注羽畎谷名雉尾至夏

則光澤故曰夏翟

禮記雉曰疏趾月令仲冬雉始

雊謂陽動則雉鳴而勾其頸也

禽經雉介鳥也以

其善搏鬪也 爾雅驚雉即山雞而小美毛采自愛
其色終日映水目眩則溺水中

豺 州境出似狗而尾長頰白高前廣後體極細瘦故
謂之豺俗傳能捕虎

紅花 諸縣胥產

白附子 獨莖發葉甚細穗極周匝形類天雄出芮城
北山地黃村

蒲黃 鹽澤有之春初發白茸漸成柄鮮潔甘脆為蒲

荀作菜佳夏初發葉成叢夏半抽梗中起花抱莖梢
名曰蒲釐似蠟燭俗名蒲蠟屑綴花中似畫家金粉

栢子仁

唐常貢陝郡貢栢子仁三十斤

瓜蔓根

唐常貢陝郡貢瓜蔓根三十斤

太陰鉉精石

產鹽地古云大鹵之場則生陰精石是

也一名鬼精一名龜背石

青礪石

色青黑剖之中有白點者佳出靜林寺東山

花蕊石

本黃石中有淡白點如花故名出靜林寺東

山澗

碩鼠 即螻蛄有五能而不能成一技能飛不能過屋
能緣不能窮木能遊不能度谷能穴不能掩身能走
不能免人 魏風曰碩鼠碩鼠無食我黍芮城古魏
國也 陸璣疏謂即爾雅鼯鼠許慎云鼯鼠五伎鼠
也河東有大鼠亦有五伎或謂之雀鼠

絳州

梁穀 唐常貢絳郡貢梁穀二十石

白穀 唐常貢絳郡貢白穀五百匹今惟織綿紬與絹
朴素無奇

毛絨 州作毛毯細者為袍衫甚佳舊作氈帽婦女童
稚皆有分功

葡萄酒 王翰賦序洪武辛酉謁禹廟有以葡萄酒見
餉者其甘寒清冽雖金柈之露玉杵之霜不能過也
百舌 聞喜縣出一名反舌 禮記仲夏之月反舌無
聲註五月陽氣極於上微陰動於下反舌無陰故無

聲也 杜詩反舌來何處重重祇報春知音兼衆話
整翮豈多身

翡翠 州境間有羽毛不及廣南

椒 有大樹出河津縣

萊服子 即蘿蔔也州山林中產者重至十五斤甘脆
無辛味生啖如雪梨

白芷 別錄生河東川谷下澤二月採根暴乾葉用合
香

三稜草 太平廣記唐河東裴同父患腹痛數年不可忍
囑其子曰吾亡後吾病必出後果出一物大如鹿條脯
懸之久乾有客竊之其堅如骨削之文采煥發遂以
為刀礮子佩之在路放馬抽刀割三稜草坐其上礮
子盡消成水客怪之回以問同同泣具言之後病狀
同者服三稜汁多驗

茉莉

州境產一名柰花

晉書都人簪柰花

桃花

州境產千葉碧桃數種汾水夾岸數十里紅似

綺錦

竹 州縣多產有三種一甜竹一苦竹一箭竹

梨 唐常貢絳郡貢梨三千顆今種色尚夥一種大如

碗味甚甘微酢多瀋

楸子 州馬首山出色深紅置數顆於案頭清香盈室

墨 唐常貢絳郡貢墨一千四百七十挺今廢

銅 唐天下鑄銅爐九十九惟絳三十當時鑄錢率倚

於絳今廢

文石 歐陽修硯譜絳州角石其色如白牛角其文有
花浪與牛角無異然頑滑不發墨世人但以研丹耳
金精石 銀精石 出垣曲絳縣

鮪 陸璣疏河南鞏縣東北崖上山腹有穴舊說此穴
與江湖通鮪從此穴而來北入河西上龍門入漆沮
故張衡賦云王鮪岫居山穴為岫也

吉州

蠟 羣山之中花卉香馥蜜蜂窟宅多在石巖穴縫暨

古木中故年久蠟藏焉

漆州出

慈烏 古有慈烏戍唐慈州名取此

鷓鴣 小鳥州出

甘草 春生青苗高二尺葉如槐七月開紫花根長
三四尺粗細不齊始生河西南川谷積沙山及上郡今
州縣山中多產此居民利之

蒼朮 苗高二三尺其葉抱莖生似棠棣根蒼黑色故

名木者山之精也吉在萬山中爰多產焉然塊大肉黃終遜茅山之堅小肉白矣

剪紅羅 一名剪春羅 羣芳譜六出周迴如剪茸茸可愛 唐詩昔聞剪作花花却春羅似欲覓剪刀痕盡付東風裏

文官果 鄉寧出

核桃 樹高丈許春初生葉兩兩相對結實至秋如青桃 漢張騫使西域得種歸植之秦中漸移東土故

吉州頗饒

堊土 鄉寧縣出

石脂 宋祥符中鄉寧山生石脂如麪可為餅餌民用
度荒

隰州

苦蕎麥 春社前後種苗似蕎麥而莖青花白實似蕎
麥而稜角不峻味最苦淘去苦汁可作糕餌

瓊漿 宋張能臣酒名記有隰州瓊漿

布 唐常貢大寧郡貢布五端 金隰州貢綠卷子布
椒 金隰州貢龍門椒

楨 果名 爾雅還味楨棗土人取其子以榨油味惡
不堪食故隰州民自道其疾苦有苦蕎麥臭楨油之
謠

蒼朮 金時充貢

五加皮 一枝五葉始生漢中今隰州谷中有之但生
南方者類草而小生北方者類木而大

歲蕤 出大寧 李時珍曰處處山中有之其根橫生
似黃精差小黃白色性柔多鬚種之易繁嫩葉及根
並可煮淘食茹


龍骨 出州境者佳別錄出晉地川谷中一統志出隰
州

鸛 州縣胥產好水將雨則鳴 禽經仰鳴則晴俯鳴
則陰

熊 穴處山谷時為民害入山行者必合羣執炬驚之

夜甚有踰垣傷人者

檀州出木性强韌可用為車



山西通志卷四十七